



PREDSJEDNIČKA VIZIJA NAPRETKA



**DEMOKRATSKA
FRONTA**



GRAĐANSKI SAVEZ

PREDSJEDNIČKA VIZIJA NAPRETKA

Poštovani građani i građanke Bosne i Hercegovine,

pred nama su Opći izbori na kojima ćete imati priliku da izaberete nove članove Predsjedništva Bosne i Hercegovine. Predsjedništvo Bosne i Hercegovine predstavlja instituciju kolektivnog šefa države te je ključna institucija u borbi za suverenitet, teritorijalni integritet i vladavinu prava države Bosne i Hercegovine.

Zbog toga vam želim ponuditi svoju viziju, koja je, postavljena u realnim okvirima, s' mapom puta' kuda i kako želim ići i raditi na poboljšanju stanja. Obraćam vam se kao predsjednik najsnažnije opozicione stranke, koja je i jedina istinska opozicija na svim nivoima vlasti u BiH i kao kandidat za člana Predsjedništva BiH. Želim naredne četiri godine biti neko ko radi na terenu, ko povezuje naše stručnjake, ko šalje nove poruke iz Predsjedništva.

Vrlo je jednostavno baviti se populizmom, obećavati neostvarivo. Ono što je teži put, a koji sam izabrao – pripremajući ovaj dokument, jeste pojasniti šta se zaista može ponuditi i uraditi. „Predsjednička vizija napretka“ je moja vizija rada Predsjedništva Bosne i Hercegovine od 2018. do 2022. godine. Tu viziju možemo provesti samo zajedno, te je želim ponuditi i drugim članovima Predsjedništva. Ovaj dokument se naslanja na izborni program koalicije Demokratske fronte i Građanskog saveza „Pobjednička BiH“ i precizno obilježava moj lični angažman po temama koje temeljno donosi naše zajedničko programsko opredjeljenje.

Želim da vratim građanima Bosne i Hercegovine nadu da je drugačija zemlja moguća. Želim da kroz ove poruke pokažem da znamo koliko je snažna sila koja nasrće na domovinu, ali da istovremeno mi ne gubimo iz vida vrijednosti, na osnovu kojih smo krenuli u borbu za nezavisnu i demokratsku Bosnu i Hercegovinu kada smo 29. februara i 1. marta 1992. godine glasali na referendumu.

Nekada se čini da su te snage slabije, da pred naletom onih koji žele podijeliti zemlju, puca i ta ideja o jedinstvu, hrabrosti i građanskoj viziji Bosne i Hercegovine. Vrijeme je da pokažemo da je ideja multietničke, slobodne i demokratske Bosne i Hercegovine jača nego ikad.

Zato tražim Vašu podršku. Vizija napretka se može ostvariti samo ako zajedno budemo radili za državu – u kojoj želimo da odrastaju naša djeca i naši unuci.

Ja lično, Demokratska fronta i naš koalicioni partner Građanski savez, spremni smo preuzeti političku odgovornost da našu državu učinimo pobjedničkom i naprednom u svakom području života.

Željko Komšić
Vaš predsjednik

VLADAVINA PRAVA

Jačanje državnih institucija i borba za pravdu

Predsjedništvo Bosne i Hercegovine je brana zaštite institucija države BiH, te ćemo u narednih osam godina morati raditi aktivno na borbi protiv ekonomskog i strukturalnog urušavanja državnih institucija. U toj borbi ćemo morati osigurati podršku i stalnu informiranost javnost o stanju i izazovima.

- **Ustavne promjene prema poboljšanju ustavnog položaja građanina**

U prvih šest mjeseci ću zatražiti donošenje javnog izvještaja o statusu svih presuda Evropskog suda za ljudska prava, Ustavnog suda BiH, Ustavnog suda FBiH i Ustavnog suda RS koji traže izmjene važećih ustava, zakona i podzakonskih akata na svim razinama u Bosni i Hercegovini, a koje nisu provedene. Zatim ću pokrenuti postupak konsultacija s akademskom zajednicom, pravnim ekspertima i praktičarima iz oblasti zaštite ljudskih prava, te ću predložiti pokretanje procesa izmjene važeće legislativne u pravcu poboljšanja ustavnog položaja građanina-pojedinca u odnosu na trenutno povlašteni status konstitutivnih naroda i tzv. 'kolektivnih prava'.

- **Sankcije protiv onih koji urušavaju ustavni poredak i zagovaranje otvorene borbe protiv korupcije: Zaštita državnih institucija i borba protiv urušavanja institucija**

Pokrenut ću konkretne korake i tražiti redovno izvještavanje državnih institucija, kako bismo zaštitili ustavni poredak. Izuzetno je važno da se detektuju sve anomalije, kršenje propisa, zloupotreba položaja. Pozvat ću sve zaposlenike državnih institucija da izađu sa informacijama o eventualnom kršenju procedura i propisa, te ih ohrabriti na prijavu nelegalnih radnji i zloupotrebe položaja.

- **Podrška jačanju pravosuđa u borbi protiv kriminala i korupcije**

Predsjedništvo Bosne i Hercegovine će snažno zagovarati veću međunarodnu podršku radu pravosudnih institucija BiH s ciljem efikasnije borbe protiv kriminala i korupcije u našoj zemlji. Nećemo dozvoliti da unutrašnje blokade rezultiraju sa smanjenim kapacitetom za rad Tužilaštva i Suda Bosne i Hercegovine, te ćemo diplomatskim vezama tražiti podršku kod već dokazanih partnera u borbi za bolje pravosuđe poput SAD-a, EU, Kraljevine Norveške itd.

- **Budžet za državu: Veće učešće državnih institucija u raspodjeli novca od PDV-a**

Pokrenut ću korake kojim ću tražiti uvećanje državnog budžeta u skladu s realnim potrebama jačanja državnih institucija. To će se dalje nadovezivati na zakonska prava državne razine, na veći udio u raspodjeli novca od poreza na dodanu vrijednost u odnosu na entitete. Ja ne mogu obećati ono što Vijeće ministara mora učiniti u dogovoru sa entitetskim vladama, ali mogu javnosti prikazati – i javno govoriti o tome, koji bi direktni efekti napretka bili postignuti ako uvećamo izdvajanja za državne institucije Bosne i Hercegovine.

SUOČAVANJE S PROŠLOŠĆU I POMIRENJE

Borba za istinu o ratu u Bosni i Hercegovini

Predsjedništvo Bosne i Hercegovine treba predvoditi proces suočavanja s prošlošću, borbom protiv negiranja genocida i drugih ratnih zločina, a onda i proaktivno djelovati na međuetničkom dijalogu i pomirenju u našoj zemlji.

- **Suočavanje s prošlošću i zajednički kalendar sjećanja**

Kao član Predsjedništva ću predložiti Kalendar zajedničkih posjeta mjestima ubijanja, genocida i ratnih zločina nad civilnim stanovništvom u Bosni i Hercegovini, te ću tražiti da Predsjedništvo zajednički obilježava ove događaje. Važno je da ovi događaji uključuju predstavnike lokalne zajednice, posjete mladih iz cijele zemlje. Vrijeme je da datume sjećanja na zločine ne koristimo za međusobna prepucavanja već kao polazišnu tačku za dijalog i pomirenje.

- **Zabrana negiranja genocida i drugih činjenica o ratnim zločinima u BiH**

Zatražit ću donošenje Zakona o zabrani negiranja genocida i drugih ratnih zločina utvrđenih od strane Međunarodnog krivičnog suda za bivšu Jugoslaviju, Međunarodnog suda pravde i Suda Bosne i Hercegovine.

- **Osigurati nastavak podrške ICMP-u u traganju za nestalim**

Međunarodna komisija za nestale (ICMP) mora nastaviti dobivati podršku Bosne i Hercegovine, te ćemo nastaviti zagovarati sve moguće mehanizme da zadržimo potpuno prisustvo ICMP-a u našoj zemlji kako bi se nastavio intenzivni rad na istragama i traganjem za nestalim.

- **Podrška uspostavi Regionalne komisije za istinu**

Institucije Bosne i Hercegovine će nastaviti podržavati pokretanje regionalnih inicijativa koje će osigurati razmjenu dokaza o počinjenim ratnim zločinima i utvrđivanju činjenica. Između ostalog, važna je uspostava REKOM-a kao inicijative koja će doprinijeti procesu pomirenja i zajedničkog narativa o ratovima devedesetih. Svaki iskorak na tom putu je napredak za cijelu regiju zapadnog Balkana.

VANJSKI POSLOVI I INTEGRACIJE

NATO je prioritet, kao i promjena pristupa vanjskoj politici

U naredne četiri godine prioritet Bosne i Hercegovine je osiguranje pozivnice za pristup NATO savezu, te zaštita procesa integracija u Evropsku uniju od blokada na lokalnom nivou.

- **Aktiviranje MAP-a za NATO i konačno određenje političkih grupacija po pitanju pristupa NATO savezu**

Kao član Predsjedništva ću zagovarati pokretanje Plana o članstvu u NATO savezu (MAP) bez obzira na činjenicu da nije finaliziran proces upisa vojne imovine. Opstrukcije koje se tiču ovog upisa dolaze od političkih snaga koje se protive NATO integracijama. Zbog toga smo dužni da to što prije otklonimo kao prepreku i stvorimo okolnosti gdje će se svi politički lideri morati opredijeliti 'ili-ili' na pozivnicu za pristup u NATO savez. Na ovom putu ćemo sve zagovaračke kapacitete usmjeriti na taj događaj.

- **Aktivno zagovaranje promjene mehanizma koordinacije u pregovorima sa EU**

Kao član Predsjedništva zagovarat ću promjene politike – mehanizama koordinacije u pregovorima sa Evropskom unijom. Tražit ću da Evropska unija postavi izričite uslove o nužnosti jačanja državnih institucija i ustavnih reformi koje će omogućiti BiH da postane punopravna članica EU.

- **Borba protiv stranih uticaja na izborni proces, finansiranje nasilnih grupa...**

Kao član Predsjedništva zagovarat ću i raditi na borbi protiv stranih uticaja na izborni proces, djelovati protiv i upozoravati na pojave nasilnih grupa, te svih drugih pojava koje sugerišu netransparentno djelovanje 'proxy grupa' u ime drugih država na području BiH koji mogu dovesti do destabilizacije zemlje. Na tom putu posebnu podršku očekujem od SAD-a, Evropske unije i Ujedinjenog Kraljevstva Velike Britanije i Sjeverne Irske.

- **Novi pristup diplomatiji i vanjskoj politici BiH**

Kao član Predsjedništva ću predložiti niz reformskih propisa u oblasti kontrole i provedbe vanjske politike BiH, posebno po pitanju koordinacije rade diplomatsko-konzularnih predstavništava. Znatno ćemo ograničiti ovlasti Predsjedništva, u smislu da ćemo tražiti podizanje kriterija za izbor bh. diplomata i uvesti rigorozni selekcijski proces. Istovremeno, vratit ćemo na dnevni red diskusiju o Zakonu o vanjskim poslovima BiH.

EKONOMSKA DIPLOMATIJA I RAZVOJ ZEMLJE

Vrijeme je da nas gledaju kao najbolju poslovnu destinaciju!

Predsjedništvo Bosne i Hercegovine može igrati važnu ulogu kada je u pitanju izgradnja pozitivne slike o našoj domovini, doprinijeti svojim radom na privlačenju stranih investicija, te osnaživanju pozicije BiH u ekonomskim odnosima. U tom procesu izdvajam nekoliko važnih prioriteta, šta raditi i u kojem pravcu.

- **Uklanjanje barijera i olakšanje izvoza proizvoda iz Bosne i Hercegovine na međunarodna tržišta**

Kao član Predsjedništva BiH ću se stalno konsultovati s Ministarstvom vanjske trgovine i ekonomskih odnosa kako bi planirali naše vanjskopolitičke poteze s ciljem osiguranja izvoznih kvota, uklanjanja barijera u liberalizaciji trgovine i osiguranju adekvatnog prostora za bh. privrednike. Isto uključuje i zajedničke posjete zemljama od interesa s domaćim privrednicima. Izuzetan prioritet na ovom putu je stalno informisanje domaće javnosti o izazovima u procesu, posebno kada je u pitanju standardizacija i osiguranje snažnih državnih institucija po pitanju izvoza u Evropsku uniju (kao što je u slučaju mliječnih proizvoda i mesa Agencija za sigurnost hrane ili Ured za veterinarstvo). Moramo građanima i građankama naše zemlje praktično prikazati korist koju domaća privreda ima od stabilnosti institucija na razini Bosne i Hercegovine.

- **Veća uključenost Bosne i Hercegovine u rad Centralnoevropskog ugovora o slobodnoj trgovini (CEFTA)**

Tržište CEFTA-e koje danas obuhvata BiH, Srbiju, Crnu Goru, Kosovo, Makedoniju, Albaniju i Moldaviju je izuzetno važno za našu zemlju, ali je njegov potencijal nedovoljno iskorišten. Naš izvoz u zemlje CEFTA-e se kreće na oko 15%, a nedovoljna uključenost u bilateralnu komunikaciju unutar CEFTA-e, te jačanje pozicije kako bi se izbjegli propusti koji na idu na štetu bh. privrede (poput nedavnog pitanja carina na mliječne proizvode od strane Kosova). Isto tako, potrebno je jačati političku poziciju CEFTA-e prema trećim zemljama, što bi doprinijelo i boljem pozicioniranju u ekonomskim odnosima na svjetskom tržištu.

- **Jačanje diskusije o ekonomskom razvoju sa predstavnicima poslodavaca, stranih investitora i investitora iz bh. dijaspore**

Izuzetno je važno da konačno promijenimo odnos Predsjedništva prema ekonomskom razvoju. Ranija tendencija je bila da se Predsjedništvo 'izmiče' od odgovornosti u ovoj oblasti, premda je moglo mnogo toga učiniti da je imalo redovna savjetovanja s predstavnicima realnog sektora. Uspostavom ovakve prakse znatno bi se doprinijelo jačanju institucije Predsjedništva i pozicije u diskusiji o ekonomskom razvoju, a prema svijetu bi se poslala jasna slika o proaktivnom pristupu državnih institucija – posebno prema stranim investitorima i investitorima iz bh. dijaspore.

- **Podrška i zagovaranje uspostave Ureda za poslovnu podršku dijaspori i Investicionog fonda bh. dijaspore**

Izuzetno je važno da uspostavimo poseban segment rada, procedura i praksi unutar naše diplomatsko-konzularne mreže koji će ohrabrivati investicije bh. dijaspore u našu zemlju. U samoj domovini ćemo podržati uspostavu trajnog institucionalnog Ureda za poslovnu podršku dijaspori koji mogu formirati kompanije i udruženja koja već rade u praksi s poslovnom zajednicom. Također, u saradnji s bankarskim sektorom, potrebno je razviti studiju izvodljivosti o uspostavi Investicionog fonda bh. dijaspore.

- **Izgradnja institucionalne mreže za ostvarivanje napretka po međunarodnim mjerilima i indeksima ekonomskog napretka**

Bosna i Hercegovina mora strateški odrediti nekoliko razvojnih mjerila, upitnika i standarda, koji se mogu ticati UN-ovih mjerila, ali i visokoprofilnih međunarodnih upitnika (istraživanja, rang liste i slično) koje nose sa sobom veliki kredibilitet u biznis komunikaciji. Ostvarivanje značajnog napretka u nekoliko takvih izvještaja, može se realizovati kroz fokusirani rad na određivanju pitanja po kojima je zemlja ranije loše ocijenjena, te uz ciljani rad i bolju koordinaciju osigurati da se u poredbenim skalama ostvari veliki napredak (konkurentnost tržišta, lakoća poslovanja itd.).

- **Donošenje strateškog dokumenta „Vaša nova poslovna prilika – Investiraj u BiH“ s 10 velikih projekata uz podršku lokalnih partnera**

U saradnji sa konzorcijima velikih bosanskohercegovačkih kompanija prema kojima bismo uputili javni poziv za prijedloge i ideje, želim napraviti prezentaciju koja će nuditi 10 konkretnih i velikih projekata za investicije u BiH. U to bi se uključile jedinice lokalne samouprave koje bi garantovale olakšice i podršku ovim projektima (brza registracija, riješeni papiri, zemljište, infrastruktura, povezanost), te bismo za ove velike projekte tražili partnere u međunarodnoj zajednici. Posjetiti Bliski Istok ili razgovarati sa globalnim investicijskim fondovima ne znači ništa ukoliko pred sobom nemamo ideje koje smo spremni ponuditi kao država. Tu Predsjedništvo igra veliku ulogu, a razvijeni lanac vrijednosti, procjena kapaciteta radne snage, te konkretni projekti, mogu privući kapitalne investicije.

- **Bosanskohercegovačka mreža zaposlenika u biznis sektoru i ekonomskim asocijacijama**

Kao član Predsjedništva ću inicirati pokretanje bosanskohercegovačke mreže zaposlenika u biznis sektoru i ekonomskim asocijacijama širom svijeta, koje će prije svega pokrenuti mentorski program, osigurati podršku našim studentima, dijeliti iskustva te zajednički zagovarati pozitivne ideje i promovirati svoju domovinu. Bosna i Hercegovina ima brojne uspješne ljude širom svijeta, koji trenutno nemaju upute i preporuke u kojem pravcu pomoći zemlji. Želimo da ovakva mreža postane baza za održavanje godišnjih događaja, sastajanja, prezentacija i povezivanja.

- **Posebne ekonomske mjere i rad sa Kinom, Turskom i Rusijom kao važnim tržištima van Evropske unije i EEZ-a**

Izuzetno je važno da Predsjedništvo BiH adekvatno prati komunikaciju prema Kini, Turskoj i Rusiji kao važnim tržištima za našu zemlju sa kojima je moguće pojačati saradnju, raditi više na direktnom povezivanju B2B (biznis-biznis saradnja). Konačno, potrebno je uspostaviti sistem 'rane uzbune' za propuste, kako bi se izbjegli skandali poput pitanja nedavnog nedopuštenog izvoza poljoprivrednih proizvoda prema Ruskoj Federaciji, koji su rezultirali privremenim sankcijama – koje su naše poljoprivrednike koštale preko 12 miliona konvertibilnih maraka manjeg izvoza.

- **Bosna i Hercegovina – Najbolja destinacija za outsourcing u Evropi**

U saradnji sa privatnim sektorom, potencijalnim investitorima iz Evrope, te stručnom zajednicom želim da sa predstavnicima državnih i entitetskih institucija uradimo ciljani set reformi koji će Bosnu i Hercegovinu učiniti najpoželjnijom destinacijom za outsourcing u Evropi. Tu prvenstveno mislim na business process outsourcing, gdje će određeni segmenti poslovanja međunarodnih kompanija biti realizovani u našoj zemlji. Također, tu mislimo i ne prebacivanje linija proizvodnje, posebno u metalnom sektoru. Imamo obrazovane ljude koji su spremni ostatu u domovini ako im se pruži prilika za adekvatno zaposlenje i plaću. I dalje su oni pristupačnija radna snaga nego većina u njihovim branšama širom Evropske unije. Na državi je samo da se 'izmakne', te da donese nekoliko progresivnih koraka – koji bi nas mogli brendirati kao najbolju destinaciju za ovu vrstu investicija.

ODBRANA I SIGURNOST

Sigurnost i politička stabilnost osnova su za razvoj i prosperitet!

Kao član Predsjedništva Bosne i Hercegovine posebnu ću pažnju posvetiti jačanju svijesti javnosti o potrebama sektora odbrane, sigurnosti i obavještajnih agencija – ne kroz miješanje u njihov rad, već kroz informisanje javnosti o njihovim potrebama, obavezama i problemima. Javnost mora znati koristi ovih službi, te potrebe i izazove sa kojima se suočavaju.

- **Povećanje transparentnosti nadzora privatnih lica**

Pokrenut ćemo proces reforme obavještajno-sigurnosnog aparata kako se korištenje zakonitih sredstava za istražne radnje ne bi kasnije iskoristilo kao mehanizam političkog pritiska i ucjena. Obavještajne strukture moraju svoje resurse usmjeriti na zaštitu građana. U tom pravcu ćemo jačati rad Nezavisnog odbora za nadzor obavještajno-sigurnosnih aktivnosti čiji će zadatak biti zaštita građanskih prava građana u tom procesu i zaštita stabilnosti države Bosne i Hercegovine.

- **Sistem ranog upozorenja za nasilne grupe**

U saradnji sa našim partnerima, prvenstveno Sjedinjenim Američkim Državama, uspostaviti ćemo sistem nadzora i ranog upozorenja za nasilne i radikalne grupe. Slučajevi poput 'Srbske časti' ili regrutacije pojedinaca u BiH za ISIL rezultat su manjka koordiniranog rada na praćenju takvih kretanja. Poseban naglasak u tom procesu moramo staviti na prevenciju, uz fokus na rad s mladima i liderima vjerskih zajednica.

- **Zaustaviti ćemo pretvaranje policije RS-a u paramilitarnu formaciju vlasti SNSD-a**

Zatražit ću formiranje Komisije koja će preduzeti radnje kako bi se ustanovilo u kojem obimu naoružavanje policijskih struktura u RS-u se kosi sa ograničenjima u naoružavanju, te da li su nabavka naoružanja i razvoj trening centara prilagođene obuci i radu policijskih struktura ili postoji procjena da bi se isti mogli koristiti u vojne/paravojne svrhe.

- **SIPA i koordinacija policijskih tijela preuzimaju nadležnost u zaštiti povratnika**

Manjinski povratak širom BiH je osjetljiva tema, te se lica koja ne pripadaju većinskoj etničkoj ili vjerskoj skupini u lokalnoj zajednici često suočavaju sa prijetnjama, govorom mržnje, napadima iz mržnje, te nedovoljnom brigom lokalnih sigurnosnih organa. Zbog toga ćemo tražiti nove ovlasti za SIPA-u koja će na isti način kako osigurava Memorijalni centar Potočari, proširiti svoje ovlasti za zaštitu lica i zajednica koja su pretrpila nasilje na osnovu rasne, vjerske ili nacionalne mržnje.

- **Posebna komisija za reviziju slučajeva krivičnih djela od posebnog interesa za javnost**

Slučajevi poput ubistva Dženana Memića ili Davida Dragičevića traže da se osigura rad posebne komisije koja će izvršiti reviziju i dodatni pregled nalaza redovnih istražnih tijela, kako bi se vratilo povjerenje javnosti u rad institucija.

- **Ulaganje u opremanje i bolje uslove za rad pripadnika Oružanih snaga BiH i policijskih struktura BiH**

Uvest ćemo novi sistem menadžmenta koji će osigurati efikasniju logističku podršku OS BiH i policijskim strukturama BiH posebno po pitanju nabavke opreme, hrane, osiguranju uslova u kasarnama i objektima za rad. Izuzetno je važno da oni koji čuvaju domovinu imaju najviši stepen brige i podrške države. Pokrenut ćemo Fondaciju za odbranu i sigurnost koja će stipendirati i sufinansirati odlaske naših oficira i službenika na međunarodne akademije, studijska putovanja i dodatno školovanje u sektoru sigurnosti i odbrane. Na ovaj način ćemo osigurati da naše institucije prate posljednje trendove u ovom sektoru i budu spremne unijeti inovacije u trenutni sistem.

LJUDSKA PRAVA I BORBA PROTIV DISKRIMINACIJE

Za temeljne građanske slobode se moramo izboriti!

U ovom segmentu se želim osvrnuti na nekoliko 'gorućih' pitanja marginalizovanih grupa u Bosni i Hercegovini. Smatram da je Predsjedništvo BiH garant primjene potpisanih protokola i konvencija o zaštiti ljudskih prava, zbog čega moramo doprinijeti više borbi protiv diskriminacije i kršenja građanskih sloboda od lokalnog do državnog nivoa.

- **Novi koncept borbe protiv segregacije: Otvorene škole**

Niz godina se borim protiv segregacije u osnovnom i srednjem obrazovanju u entitetu Federacija BiH, koji se u javnosti naziva 'dvije škole pod jednim krovom'. Nastojao sam na ovo pitanje reagovati i kroz apelacije prema Ustavnom sudu BiH. Ono što u narednih osam godina želim uraditi – jeste napraviti rezultate na terenu. Vrijeme je za razgovor. Želim običi sve škole koje se smatraju da potpadaju pod ovaj sistem u naredne četiri godine, te razgovarati sa đacima, nastavnicima/učiteljima i roditeljima. Kakav oni sistem žele? Čega se plaše, šta su njihovi strahovi, koja su njihova rješenja? Iz toga želim da pokrenem inicijativu za pokretanje Fonda otvorenih škola koji bismo pokrenuli u saradnji sa međunarodnim akterima i donatorima, ali i tražili osiguranje posebnih sredstava na razini države. Fond bi finansirao prevazilaženje podjela u segregiranim školama, kroz podršku zajedničkim aktivnostima, obnovi i rekonstrukciji zajedničkih prostorija, opremanju i podršci zajedničkim putovanjima, naučno-istraživačkim projektima i kreiranju proaktivnih rješenja za prevazilaženje podjela. Uvjeran sam da možemo napraviti znatno veći iskorak, ako predstavnici institucija shvate da se segregacija 'ne isplati'.

- **Zagovarat ćemo uvođenje mehanizama sankcije putem Institucije ombudsmena za ljudska prava BiH**

Smatram da je potrebno značajno izmijeniti funkciju i ovlaštenja Institucije ombudsmena za ljudska prava BiH, te uvesti mogućnost da ova institucija izriče sankcije za kršenja ljudskih prava – u smislu novčanih kazni, a posebno prema odgovornim licima u institucijama.

- **Tražiti ćemo ravnopravnost vjerskih zajednica i konačno rješavanje sporazuma sa Islamskom zajednicom**

U prve dvije godine ovog mandata potrebno je ratificirati Ugovor Bosne i Hercegovine s Islamskom zajednicom, kako bi se ova vjerska zajednica dovela u ravnopravnu poziciju sa Svetom Stolicom i Srpskom pravoslavnom crkvom. Također, Predsjedništvo je dužno pozvati i druge vjerske zajednice te osigurati mogućnost potpisivanja sličnih sporazuma, za slučaj da iste procijene da pojedinci i specifičnosti zajednice nisu dovoljno prepoznate u važećem Zakonu o slobodi vjere i pravnom položaju crkva i vjerskih zajednica.

- **Zagovarat ćemo mjere zaštite manjinskog povratka**

U saradnji sa druga dva člana Predsjedništva, želim pokrenuti proces osiguranja veće zastupljenosti tzv. 'manjinskih povratnika' u institucijama vlasti te u strukturi zaposlenih u javnim institucijama i preduzećima kroz mjere afirmativne akcije, ohrabrenja, stipendiranja i podrške. Također, želim taj proces otvoriti i kroz veću komunikaciju sa resornim državnim i entitetskim ministarstvima izbjeglih i raseljenih lica, kako bismo utvrdili broj povratnika i lica koja čekaju povratak.

- **Predsjedništvo kao institucija-zagovornik prava žena**

Ženska prava su ljudska prava i zato moraju biti prioritet rada Predsjedništva. Dugo se zanemarivala ova problematika na razini onoga što prema javnosti komunicira Predsjedništvo. Rodna ravnopravnost i podrška inicijativama žena će se vratiti u fokus, posebno kada je u pitanju diskriminacija u zapošljavanju, porodično nasilje, neravnopravnost po pitanju prava porodilja širom zemlje i slično. Konačno, Predsjedništvo će biti zagovornik osiguranja garantovanih kvota i zaštite ravnopravnosti spolova na svim razinama vlasti. Povećat ćemo i učiniti efikasnijom saradnju sa međunarodnim organizacijama koje se bave ovim pitanjem.

TURIZAM, KULTURA, SPORT I UMJETNOST – NOVA SLIKA BIH

Bosna i Hercegovina koju s ponosom predstavljamo!

Kao član Predsjedništva BiH želim da doprinesem novom imidžu i novoj slici Bosne i Hercegovine kroz promociju turizma, podršku projektima kulture, razvoju sporta, podršci nacionalnim timovima i reprezentacijama, te potpori umjetnosti u Bosni i Hercegovini.

- **Zaštita sedam institucija kulture**

Zatražit ću donošenje trajnog rješenja za sedam ustanova kulture od značaja za Bosnu i Hercegovinu. Izuzetno je važno da se ove institucije osiguraju kroz trajno i održivo finansiranje i donošenje zakona koji će regulisati njihov pravni status na nivou države BiH i usko ih vezati za podršku Ministarstva civilnih poslova BiH.

- **Uspostava Nagradnog fonda za izvanredne sportske rezultate**

Zatražit ću donošenje pravnog okvira kojim će se uvesti redovno finansiranje i stipendiranje izvanrednih sportskih talenata, osigurati podrška odlasku sportista na međunarodna takmičenja, te formiranje Nagradnog fonda po jedinstvenim kriterijima za izvanredne sportske rezultate. Također, zagovarati ću osiguranje ravnopravnosti žena i muškaraca sportista, kada je u pitanju budžetska podrška sportu. U saradnji sa već postojećim projektima, radit ću na promovisanju mobilnosti učenika širom BiH kroz sportske igre, univerzalne škole sporta i takmičenja za različite kategorije u što je moguće široj lepezi sportskih aktivnosti na nivou države BiH.

- **Audio-vizuelna umjetnost od državnog značaja**

U saradnji s festivalima, produkcijskim kućama, rediteljima i akademijama ćemo pokrenuti novu kampanju – zajedno sa različitim razinama vlasti u BiH kojim ćemo promovirati Bosnu i Hercegovinu kao prvorazrednu destinaciju za snimanje filmova, razvoj audio-vizuelne umjetnosti, a pokrenut ćemo inicijative za veću uključenost mladih talenata u različite projekte. Manifestacije poput Sarajevo Film Festivala će biti ključne tačke spajanja u tom procesu, ali i sve institucije u ovoj oblasti.

- **Zajednički poduhvat za promociju BiH kao turističke destinacije**

U saradnji s turističkim zajednicama, resornim ministarstvima na svim razinama, kreativcima iz cijele zemlje, pokrenut ćemo i biti na čelu nove kampanje promocije Bosne i Hercegovine kao atraktivne turističke destinacije, na tragu ranijih aktivnosti projekta „Enjoy life in Bosnia and Herzegovina“. Ovog puta ćemo to učiniti kroz podršku mladih generacija, promocijom putem društvenih mreža, te uključivanjem svih lokalnih zajednica. Hajde da zajedno radimo na tome – da promoviramo svoju domovinu u svijetu. Želim da pokažemo da možemo svojom ulogom dati doprinos u tome.

- **Očistimo Bosnu i Hercegovinu!**

U skladu sa ranijim globalnim inicijativama 'Let's do it' i slično, pokrenut ćemo masovne akcije mladih i starih, kojim ćemo očistiti Bosnu i Hercegovinu, kroz zajedničke akcije čišćenje korita rijeka, parkova i slično. Važno je da čelni ljudi države učestvuju u ovakvim akcijama, kako bi mladi prepoznali da je to vrijednost koju moramo zajedno štiti.

NOVE PRAKSE U KOMUNIKACIJI S GRAĐANIMA I GRAĐANKAMA BOSNE I HERCEGOVINE

Otvoreno Predsjedništvo

S novim mandatom želim uvesti nove prakse u komunikaciji institucije Predsjedništva BiH s građanima i građankama naše zemlje.

- **Stanje države: Polugodišnje obraćanje članova Predsjedništva BiH**

Predložiti ću članovima Predsjedništva BiH da pripremamo polugodišnja obraćanja o 'stanju države' kako bismo građanima predočili kretanja unutar institucije, ali i o odnosima u državi. Ova obraćanja bi se trebala fokusirati na postignuti napredak, ostvarene rezultate, ali i realne izazove. Važno je da građani kroz obraćanja tri člana Predsjedništva vide gdje svi ulažemo napore da postignemo konsenzus, a koji su naši izazovi i razlike.

- **Susreti s udruženjima, klubovima, inicijativama**

Do sada je praksa bila da pojedine grupe šalju zahtjeve Predsjedništvu BiH za prijeme i susrete. Uvest ćemo praksu proaktivnog pristupa gdje će se otvarati termini za prijeme na koje će udruženja, klubovi i inicijative moći aplicirati – te dobiti prostor za razgovor i dijeljenje ideja sa Predsjedništvom BiH.

- **Posjete terenu i lokalnim zajednicama**

Uvest ću obavezu da u toku godinu dana imamo okrugle stolove s građanima, da bismo zajedno kao članovi Predsjedništva razgovarali o problemima, sastali se s lokalnim liderima i konsultovali se s građanstvom o izazovima pred našom zemljom.

- **Odgovorani rad i dostupnost**

Kroz Kabinet ću nastojati osigurati dostupnost podataka prema javnosti, te osigurati prijateljsku, profesionalnu i korektnu saradnju s medijima. Izuzetno je važno da svakog dana radimo na poboljšanju slike koju domaća i svjetska javnost ima o našoj Bosni i Hercegovini. Vjerujem da će ovaj program, koji je ograničen i usklađen s onim što su nadležnosti Predsjedništva, biti iskorak u bh. politici, zaštititi njen teritorijalni integritet, donijeti ekonomski prosperitet i unaprijediti stanje ljudskih prava. Na kraju svega, izuzetno je važno da očuvamo mir, stabilnost i sigurnost svih građana i građanki Bosne i Hercegovine. Da bismo to postigli, potrebna mi je Vaša podrška.

S poštovanjem,

Željko Komšić, građanin Bosne i Hercegovine, predsjednik Demokratske fronte,
Vaš kandidat za člana Predsjedništva Bosne i Hercegovine

Predsjednička vizija napretka
www.komsic.ba